

Pol da Pilimon do Papia Mandagit

But piso gen

Pilimon uŋun man bini toŋ amin kinda. Uŋun Kolosi kokup pap dakon Yesu yolyol amin kinda. Oman monjini kinda mani Onesimus uŋun amin madepni yipman degek pasal kiŋ kokup kindakon egipgut. Uŋun kokup papmon Onesimus Pol aŋalon aŋek Yesu yolyol amin dagagit.

Uŋun bisapmon Pol dam tebanon egipgut, do Pilimon aripmi dima kiŋ kosak. Mani on papia mandaŋ Onesimus do iban madepnikon aŋkigit. Rom dakon gen teban da oman monji kinda pasal kisak kaŋ, madepni da tagi aŋakban kimotjak do yosok. Mani uŋun papiagwan Pol da Pilimon oman monjini tebai dima iyisak do mandagit. Oman monjini uŋun Yesu yolyol amin kili dagak, do notnosi yaŋon da abidosak.

Pilimon dakon oman monji pasal kigit da don Yesu yolyol amin dagaŋban, Pol da yabekban tobi ae Pilimon do kigit

¹Nak Pol, Yesu Kristo yoldat do aŋek dam tebanon egisat. Nak gat ae notnin Timoti, nit da papia on Pilimon gak do mandamak. Gak notnin tagisi ae pi isalnin. ²^aNit papia on saminin Apia kisi do mandamak. Ae Akipus Yesu do aŋek yokwi pabiŋ yop do nin gat kaloŋi emat amaŋ uŋunyo kisi do mandamak. Ae paŋmuwukbi Pilimon gak da yutnon muwuk muwuk aŋ uŋun kisi do mandamak. ³Nit Piŋkop Datnin, ae Amin Tagi Yesu Kristo, uŋun da nandaŋ yawot aŋ damiŋek butji paŋyawot aban yawori tosak do bisit amak.

Pilimon dakon aŋpakni tagisi do Pol but galaksi nandagit

⁴Bisapmi bisapmi bisit asaron, nak gak do nandaŋek Piŋkopno ya yaŋ iyisat. ⁵Nido, toktogisi amin da yaŋ nayaŋ, gak Amin Tagi Yesu nandaŋ gadaŋ imiŋ kimokdol, ae Piŋkop dakon miŋat aminyo but dasi galak

^a 2 Kol 4.17; 2Ti 2.3

taŋ yomiŋ kimokdol. ⁶Piŋkop da gak aŋpuluŋaŋban yipmaŋ deri mini miŋat aminyokon Yesu do nandaŋ gadat asal uŋun yaŋ teŋteŋok abi do Piŋkop bisit iyisat. Yaŋ aŋaki Kristo da yo morap tagisi nimisak uŋun do pakyaŋsi nandaki. ⁷^bNot, gak Piŋkop dakon miŋat aminyo morap but dasi galak taŋ yomiŋ kimagek butni paŋteban asal. Yaŋ aŋaki uŋun da kisik kisik madepsi namijaŋkwan butno yaworisi tosoŋ.

Pilimon da Onesimus notnosi yaŋon da abidosak

⁸Yo kalonjisi kinda abi do nandisat. Kristo da manon uŋun si abi do nak da tebai tagi gayikeŋ. Mani, aŋpak tagisi asal uŋun nandisat, ⁹do gen tebai dima gayikeŋ. Amin do but dasi galak taŋ yomyom aŋpak da nit kisi timikdak, do nak gen yaworisok gayikeŋ. Nak Pol, Yesu Kristo dakon gen yaŋ teŋteŋok asat, ae Kristo dakon pi uŋun do aŋek dam tebanon egisat. ¹⁰^cMonjino Onesimus do aŋpak tagisi aŋ ibi do gayisat. Dam tebanon egapbo Onesimus nagon aŋgut bisapmon, nak da Kristo bamisi nandaŋ gadaŋ imjak do aŋpulgagam. Do uŋun monjinosi yombem agit. ¹¹Kalip gak aŋpulgok do pi tagi dima agit. Mani abisok pi tagisi aŋek gak gat ae nak gat kisi tagisi paŋpulgokdisak.

¹²Abisok yabekgo nak dakon but gat kisi gagon tobiŋ obisak. ¹³Abisok Gen Bin Tagisi yaŋ teŋteŋok dakon pi do aŋek dam teban amin egisat bisapmon abidoko gak da tamokon pi asak kaŋ, nak uŋun do tagisi nandakeŋ. ¹⁴Mani gak dakon yaŋ dagok dima kaŋek yo kinda dima abeŋ. Gak da idon egek nak aŋpulgusak do nandisal kaŋ uŋun gak dakon galak tok. Nak tebai dima gayikeŋ. ¹⁵Asi, Onesimus bisap piŋpimisok gepmaŋ deŋgit. Mani yo uŋun noman taŋ imgut, uŋun gak da yokwikon naŋ ae abidaŋbi gak gat toktogisi egipjil do bo noman tagit. ¹⁶^dAbisok uŋun gak dakon oman monjigin dima. Asi uŋun gak dakon oman monjigo egisak, mani abisok gak dakon notgosi dagak do but dasi galak taŋ ibi. Naga koko notnosi aban but dasi abidosot. Mani nandisat, gak da but dasi galak taŋ imiŋ kimotdisal. Oman monji pini aban kaŋ galaktokdisal, ae Kristo do aŋek gak da kaŋbi notgosi aŋakwan but dasi galak taŋ imiŋ kimotdisal.

¹⁷Do Kristo da pikon nit kalonjisi ekwamak yaŋ kosol kaŋ, nak opbo but dasi niaŋ abidaŋbim, Onesimus do yaŋ giŋ abi. ¹⁸Gagon gulusuŋ di agit, bo ae gagon goman di agit kaŋ, mani kulabik aŋek uŋun gomanon nak dakon man mandaki. ¹⁹Nak Pol da naga dakon kisiŋ da papia on mandisat. Nak da naga goman uŋun sopbeŋ. Mani nandaki! Nak da gen bami gayiko nandaŋ gadat aŋiŋ, do gak nagon gomango toŋ. Goman uŋun gaga dakon egip egipgo. Mani uŋun do dima yokeŋ. ²⁰Not, nandaki. Amin Tagi da manon gak aŋpak tagi on nak do abi do nandisat. Nit Yesu

^b 7 2Ko 7.4 ^c 10 1Ko 4.15; Kol 4.9 ^d 16 1Ti 6.2

Kristo dakon amin ekwamak do unjun anpak anek nak dakon but anteban abi.

²¹Papia on mandanek yanji nandisat, gak da nak dakon gen on guramitdisal. Nak nandisat, Onesimus do anpak akdisal, unjun da anpak abi do gayisat unjun yapdisak.

²²eAe nak gen kinda gat tosok. Nak Pin kop da ji dakon bisit nandakdisak, anek nak nepban jikon tobil apdisat yanji nandan gadasat. Do yutgokon yut buri kinda nak da pokgen do anoman abi.

Pol dakon pi isalni da Pilimon do gildatni tagi yipman iman

²³fEparas da gildat tagi yan gayisak. Unjun kisi Yesu Kristo do anek dam tebanon ekwamak. ²⁴gNak dakon pi isalno, unjun Mak, ae Aristakus, ae Demas ae Luk unjunyo kisi da gildat tagi yan gayan.

²⁵Amin Tagi Yesu Kristo dakon nandan yawot da ji dakon wup gat egipjak do bisit asat.